



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tiryimym@aolima



tir yimym

TAPAK 8

Ukraine Tir Zelenskyy-i UK semdang

LeBron James-i NBA all-time scoring record raksa



VOL. XX NO. 118 (ADOK 118) DIMAPUR YANGTEPNÜ (THURSDAY)

TSÜKLAI (FEBRUARY) 09, 2023

₹ 5.00

NLA election atema tetsür 4 dena candidate 225 lir

Kohima, February 8, 2023 (TYO): February 27 Nagaland assembly election atema Mongulbarnü nomination file asüba maparen tembangogo aser candidate ajak agi parnok 225-i tenüing agütsü.

Taküm assembly election nung tokteptsü atema tenüing agütsürtem rongnung tetsür pezü dena lir.

Yashi tatemangba anogo nung political party balala nungi candidate aser Independent candidate ajak meyokteper parnok 101-i nomination file süa liasü.

Nagaland kübok district telesa: Dimapur nung assembly menden 3 atema candidate 14, Peren nung menden 2 atema 10, Kohima nung menden 6 atema 19, Pughoboto nung menden 1 atema

2, Phek nung menden 5 atema 19, Mokokchung nung menden 10 atema 32, Zunheboto nung menden 6 atema 13, Wokha nung menden 4 atema 18, Mon nung menden 9 atema 39, Longleng nung menden 2 atema 10, Tuensang nung menden 4 atema 14, Kiphire nung menden 2 atema 9, Noklak nung menden 2 atema 6, Tsemnyu nung menden 1 atema 7, Chumoukedima nung menden 2 atema 9 aser Shamator nung menden 1 atema candidate 4 lir.

District 16 nung Nuiland district dang Chumoukedima district kübok Ghaspani-I A/C dena lir. Külen, Zunheboto district kübok Pughoboto A/C ya election district balaka lir.

Kohima DC & SP nati election maparen lemsat

Dimapur, February 8, 2023 (TYO): 14 buba Nagaland Legislative Assembly 2023 indang General Election atema Bodbarnü Kohima DC & DEO, Shanavas C IAS-i senden ka ayonga menogo.

Shanavas C-i Kohima district atema Police Observer, General Observer aser Expenditure Observer nung den district osang lemsat.

Kohima district kübok Constituency 6 (ST) lir aser Polling Stations 184 aliba nungi Urban kübok 69 aser Rural

kübok 115 lir, ta pai ketdangsürtem dang metetdaksü.

Paisa election dak sendakba osangtsüasang ajak lemsat.

Külen, Superintendent of Police Kohima, Imnalensa IPS-ia Police Department-i General Election atema maparen inyakba osang PowerPoint presentation ka ajanga lemsat.

January 18, 2023 nungi February 8, 2023 tashi Kohima Police-i Rs. 3,11,99,835 alang puogo ta SP Imnalensa-isa metetdaksü.

Nagaland nung Rs 31 crores puogo

Dimapur, February 8, 2023 (TYO): Nagaland nung January 18 nungi February 7, 2023 tashi nung enforcement agency balalai Rs 31,03,03,137 tashi sen, yi, mozü aser election nung amshiba osettem puogo.

Election ketdangsürtemi sen Rs 1,62,03,850, Rs 1,62,03,850 alang IMFL, Rs 23,32,6,8354 alang mozü seret 3.06 aser Rs 1,86,15432 alang tanga osettem apu, ta Nagaland chief electoral officer indang office ajanga metetdaksü.

February 7 nü enforcement agency temi sen Rs 60,000, Rs 4,21,076 alang yi, Rs 15,51,273 alang mozü, spasmoproxyvon capsules 6,909 o cough syrup pongdang 210 aser Rs 20,32,349 alang osettsüsettem apu, ta parnok ashi.

Election Commission of India ajanga Dimapur I, II aser III Assembly constituency tem asoshi Election expenditure officer (EEO) inyaksü shimba Suboth Singh-i assembly elections mapang sen tashi ajanga voters memesüzdaksütsü ashi.

Dimapur district nung flying surveillance teams (FST), static surveillance teams (SST), video surveillance team (VST), video viewing team (VVT) aser media certification and monitoring committee (MCMC) ketdangsürtem den senden ka amendang Suboth Singh-i iba ya ashi.

EEO Suboth-isa pa indang official number 7005155223 metetdaksü aser nodal officers o voters-i pa den indangindanga tongtepreptsü metetdaksüogo.

AICC tashi angaa tokteper: K Therie

Dimapur, February 8, 2023 (TYO): Dimapur-I assembly constituency nung tokteptsü tebilemba kecha maliasü saka AICC-i ashiba ajanga tokteper ta Congress president K Therie-i ashi.

Party president-i nübortem asoshi tokteptsüla kechiyong nübortem den onük aika ajanga sendaktepba raksatsü ta AICC lennirtemi ashiba ajanga tokteper, ta pai ashi.

Dimapur I A/C nungi General

Secretary Enrollment, NPCC Rajesh Kumar Sethi tokteptsü atema party-i tenüing agütsü saka AICC lennirtemi ashiba ama tatem nung pa melen. Rajesh-i yaritepba aser amalitepba atema kanga pelar, ta Therie-isa ashi.

Nagaland Legislative assembly nung mangdang tasen ka agütsütsü atema Dimapur district nung alirtemi Congress candidate tem takok ngudaksütsü mepishir, ta paisa ashi.

India sorkari United Nations Charter 1(2) akhümtsübuttsüla: WC, NNPGs

Dimapur, February 8, 2023 (TYO): Naga nung aser India sorkar tsüingda yimten tenanzüktep aika sign sütepba rongnung political document ji 'Agreed Position' dang lir, ta Media Cell, WC, NNPGs-i metetdaksü.

"Right To Self Determination" of peoples indang United Nations (UN) charter 1 (2) adenba document ji November 17, 2017 nü India sorkar aser Working Committee (WC) Naga National Political Groups (NNPGs) tsüingda sign asüba 'Agreed Position' ya dang lir, ta parnok ashi.

India sorkar aser WC, NNPGs tsüingda "Agreed Position" agiba aser ano iba status paper nung tim masüba kecha enoksema mali. India sorkari Naga nung jenjang agizükogo aser Naga nung pei sasa ketdangsüa aotsü asoshi yimten aser putiotsü temeten agizükogo. Anungji Agreed Position nung tashishitsü kecha mali, ta Media Cell-i sangdong nung ashi.

Tanü yimtenren tensa ajanga Indo-Naga mangatettep ano mekoktetba sayur. India sorkari

kümsük shia elections agia Kohima nung puppet state government ka amenoka lir aser iba ya Naga lima nung India yimtenren aser ketdangsübaren benoktsü atema lir, ta parnok ashi.

Ajisüaka, Indian election ajanga Naga nationalism tangatetba samatsütsü makok. Election ajanga Naga nungeri yimten temeten aser taginübatem mesamatsü aser Nagaland nung tashiyim agi election agiba shia Naga nung tashi itshitsü, ta parnokisa metetdaksü.

India Prime Minister Narendra Modi-i 2015 kum Dubai, UAE nung Naga khuret koktetogo ta sangoktsüba nung Naga nung i temulung alem saka yimten kong lateta lir" 2018 election nung Naga nung ashishitep saka 'Yimten latettsü atema Election' yimym agizük, saka kum pungu süiogo, olemtep tembangogo saka India aser Nagaland state sorkartemi Naga nung anishir, ta WC, NNPGs-i ashi.

Nagaland nung Assembly elections agitsü anungji Naga nung ano ashiodaksütsü asü?

ta parnokisa asüingdang.

Indo-Naga yimten latetba nung yariteptsü atema opposition maliba sorkar aküm ta Nagaland Chief Minister-i shiogo. 2021 kum tatemlen Nagaland Governor R.N Ravi anienba ya sorkari inyaktetba mapa tulu ka liasü ta pai ashi. Ajisüaka, pai Naga yimten tebilemstü koktettsü atema inyaker ta ashibaji tiyazü liasü aser pai telesa talila adoktsü aser nübortem taginüba nembangtsütsü atema sen crore aika agütsür aser gari tajungtem alia agütsür, ta WC, NNPGs-isa metetdaksüogo.

Naga tebilemstü ya India nüjiso anguba dang nungi tambu lir. Naga nung kar dang British yimsüsüba kübok liasü aser United Nations Charter 1(2) ajanga India amala linüktem dang Naga nung linük amala ajembanga mayutsü nenshir. Anungji WC, NNPGs-i maneni Naga nung atema kechi shitak iba atema maneni inyaksü aser elections ajanga Naga nungeri tarutsü atema inyakba mapa tashimait mekümdaksütsü, ta parnokisa sangdong nung ashi.

Feb 14 nü 'Cow Hug Day' amongtsü ayongzüker

New Delhi, February 8, 2023 (Agencies): Küm shia alima nung February 14 nü Valentine's Day amonger saka India nung Animal Welfare Board of India (AFIB)-i iba anogo "Cow Hug Day" amongtsü tayongzüker agütsüogo.

Department of Animal Husbandry and Dairying kübok AFIB-i nübortem dang February 14 nü Cow Hug Day amongtsü metetdaksü.

"Nashi meimertem ajaki mother cow ya tongtipang ta angateta February 14 nü Cow Hug Day amongtsü akok aser iba

ajanga taküm nung tepela aser tajung ajurutsü" ta AFIB-i ashi.

Nashi dak azüitba ajanga temulung sangwar aser nisung ka dak tepela teimba akümer, ta parnokisa ashi.

Iba sangdong ya social media nung kanga prokshir aser AFIB secretary Dr Sujit Kumar Dutta-i sign süa lir. Sangdong nung AFIB-i West sobaliba ajanga Vedic sobaliba samatsü tia ka nung lir ta shia lir.

West sobaliba ajanga asenok sobaliba aser senmang amadokr, ta parnokisa ashi.

"Union ministry-i onok dang

iba temepishiba sangdongtsü tetuyuba agütsü. Ano iba atema onok dang shidi aika aruogo. Tang ya mapang petdakra aser iba jagi kecha meinyaketer, saka onoki nübortem aser nukranartem dang mepishia metetdaksüogo" ta AFIB assistant secretary Prachi Jain-i ashi.

Iba temepishiba ya state ajak asoshi asü koda ta osangbeneri asüingdang "iba ya state ajak atema lir. Animal welfare ya state ajak atema lir. Gujarat aser state aikati February 14 nü Cow Hug Day ta ser amongtsü" ta Jain-i langzü.

Kohima nung kiyong kati 'Clean Election' akangshitep

Dimapur, February 8, 2023 (TYO): Nagaland yimtiba Kohima nung kiyong kati election mapang tensa meraksatsü aser election tiptema aser merüka agitsü atema bangjemtepogo.

February 8, 2023 nü Lower PWD Panchayat lennirtemi senden ka amendang telemtetba aika agiogo.

Lower PWD Panchayat-i 'clean election' pusema nungitsü

asir kiyong nung political party indang tesep melapokdaksütsü telemtetba agi.

Parnokisa kiyong nung poster meyudaksütsü, public wall nung kecha mezüludaksütsü, wako/ banners kecha mayutsü aser public/sorkar kiojentem menenmechi masütsü atema lemtet.

Talisa polling anogo colony nung voter tem dak alaka kiyong

nung malirtem shinga marudaksütsü atema aser teintem rogotemi mezüing vote enoktsü atema maongka agütsütsü ta parnokisa telemtetba agiogo.

Lower PWD Panchayat nung public/kija shingaia tensa meraksatsüla aser iba tetuyuba alema inyakertem Colony Panchayat-i merenshitsü ta Chairman Meyi Sanglir-i sangdong ka nung metetdaksü.

" Sübokremji tilaka dang asütsü akok, saka iba aibelenji tulu ". Edward cake

- Ungma Baptist Arogo Laishir Telongjem Clean Election Tayongzüker



Master Trainers temi Kohima district atema Election Observers nem Electronic Voting Machine (EVM) amshiyim training ka Deputy Commissioner, Kohima indang Conference Hall nung February 8, 2023 nü agüja liasü.

Mkg DC & DEO ajanga Postal Ballot atema metetdaksür

Dimapur, Tsüklai/February 08 (TYO): Postal ballot atema Form 12 meshir asoshi vote agütsüsü atema anogo aser tesem yamai alitsü, ta Deputy Commissioner & District Election Officer, Mokokchung, Shashank Pratap Singh, IAS ajanga sangdong ka nung ashi.

2nd NAP personnel tem February 20, 2023 nü NAP Camp, Alichen; DEF, Home Guard, Fire servicem NPTO personnel atema February 21,

2023 nü Town Hall, Mokokchung nung, DC/DEO staff, Sector officers, EEM Teams, Driver tem atema February 22, 2023 nü Town Hall Mokokchung, 13th IR Yajang personnel tem February 22, 2023 nü 13th IR Camp Yajang aser Polling personnel pur February 23, 2023 nü Twon Hall, Mokokchung nung alitsü.

Shia aliba anogotem vote agütsüba mapang ya anepdang 9:00 nungi 4:00 ako tashi alitsü.

Maneni Deputy

Commissioner & District Election Officer, Mokokchung, Shashank Pratap Singh, IAS ajangasa sangdong ka nung ashiba agi, Senior Citizens, PwDs aser COVID-19 temolung melemi alir mesüra kongshia alirtem Postal ballot ajanga vote agütsüsü asoshi 1st visit atema February 21, 2023 nü AVSC/AVPD/AVCO indang address nung agütsüsü aser 2nd visit atema anepdang 8:00 ako nungi nikongdang 4:00 ako tashi alitsü.

DC & DEO Mokokchung ajanga Polling Officers atema totuyuba agütsür

Dimapur, Tsüklai/February 08 (TYO): Deputy Commissioner & District Election Officer, Mokokchung, Shashank Pratap Singh, IAS ajanga sangdong ka nung presiding officers aser polling officers tem dang 14th Nagaland Legislative Assembly atema General Election agütsü asoshi nungloktsüba mapa shidak inyaktüsü metetdaksü.

Iba maparen atema shimteta aliba ketdangsürtem ya Election Commission of India indang deputation nung lir, anungji Election

Commission indang tazüokba kübok alitsü ta Representative of People Act, 1951 indang Section 28 nung shia lir.

Representative of People Act, 1951 indang Section 26 ajanga item mapa nungloktsüsü aser aibelener iba Act indang Section 134 kübok merenshitsü asoshi DEO nem tashi agüja lir.

Iba tangatetba ya training class nung adentsü memolunger tem asoshia kasa lir, kechiaser item ya polling personnel shimer inyaktüsü maparen lir. Training ya

Mayangnokcha Government Higher Secondary School, Mokokchung nung February 10 aser 11, 2023 anogotem agütsü lir, ta sangdong ajanga ashi.

Department balala indang Heads of Offices/ Nodal Officers ajungai iba training nung adentsü asoshi pei establishment nungi ketdangsürtem yoktsüla. Iba training nung madener mesüra duty meinyaker nem election özüngtem kübok tapet temerenshi alitsü, ta sangdong ajangasa ashi.

Kohima district atema Election Observer aruogo

Dimapur, Tsüklai/February 08 (TYO): Deputy Commissioner & District Election Officer, Kohima, Shanavas C IAS ajanga political party, candidate aser nübur ajunga dang sangdong ka nung ashiba agi, 14th Nagaland Legislative Assembly Election 2023 atema aruya aliba General Election asoshi Kohima district atema Election Observers tonga aruogo aser election dak sendakba ken o balala atema parnok den agüja aliba contact number ajanga aser tesem nung oa ajuruteptsü akok.

8 - Western Angami, 9 - Kohima Town, 10 & 11 - Northern Angami - I & II aser 14 & 15 - Southern Angami - I & II Assembly Constituencies atema Police Observer Dr. Anirban Ray, IPS den mobile number

9932210820 ajanga jembitettsü aser public interview ya S.P. Office nung nikongdang 6:00 ako nungi 8:00 ako tashi alitsü.

9 Kohima Town, 10 Northern Angami - I & 11 Northern Angami - II Assembly Constituencies atema General Observer M.J Pradip Chandren IAS den mobile number 9366606229 ajanga jembitettsü aser public interview ya nikongdang 3:00 ako nungi 5:00 ako tsüngta Hotel Japfu nung agitettsü.

8 Western Angami, 14 Southern Angami - I aser 15 Southern Angami - II Assembly Constituencies atema General Observer Janak Prasad Pathak, IAS den mobile number 8787844624 ajanga jembitettsü aser public interview nikongdang 4:00 ako nungi 5:00 tsüngta Hotel

Japfu nung agitettsü.

9 Kohima Town, 10 Northern Angami - I aser 11 Northern Angami - II Assembly Constituencies atema Expenditure Observer Samatha Mulla mudu, IRS den mobile number 9863704678 ajanga jembitettsü aser public interview anepdang 8:00 ako nungi nikongdang 8:00 tsüngta Hotel Japfu nung agitettsü.

8 Western Angami, 14 Southern Angami - I aser 15 Southern Angami - II Assembly Constituencies atema Expenditure Observer Shyam Kumar, IDAS den mobile number 7005317350 ajanga jembitettsü aser public interview nikongdang 4:00 - 5:00 ako tsüngta Hotel Japfu nung agitettsü.



Pre-poll alliance indang ochi tangatetba nung ajemdaker 24th Angetyongpang A/C nungi BJP aser NDPP telungjem senden ka NDPP candidate Tongpang Ozukum kidang February 8, 2023 nü mena liasü. Mokokchung District vice-president aser Mandal president-i anir BJP nung party worker temi February 27 nü agütsü aliba 2023 Nagaland Legislative Assembly Election nung takok angutsü asoshi teka amteper inyaktüsü nangzük.

Dimapur nung postal ballot atema Facilitation Center amenoktsü

Dimapur, Tsüklai/February 08 (TYO): Nüburtemi aginüba ama postal ballot ajanga vote agütsüsü atema facilitation center ka amenoktsü, ta Deputy Commissioner, Dimapur, Sachin Jaiswal, IAS ajanga sangdong ka nung ashi.

Iba atema election dak sendakba ketdangsür shirnoki aruya aliba Nagaland Legislative Assembly 2023 atema General Election nung postal ballot amshia vote agütsüsü jangra ali, parnoki Office of the Deputy

Commissioner & District Election Officer, Dimapur nung aliba Postal Ballot Cell nungi FORM-12 meshitsü aser iba form nung nungdakba zülur February 10, 2023 tashinung Office of the Deputy Commissioner & District Election Officer, Dimapur tongtsüsüla, ta sangdong ajanga ashi.

FORM-12 agütsüsü aser agizüktsü atema item kuli kakettem agütsüsüla:

1. Appointment Order
2. Photocopy of EPIC

Mokokchung District atema Election Observers aruogo

Dimapur, Tsüklai/February 08 (TYO): Mokokchung district nung Nagaland Legislative Assembly Election 2023 tajungtiba nung agitettsü asoshi Election Commission of India ajanga jenjang balala nung shimba Election Observers tem tonga arugo aser GA Rest House, Mokokchung nung anena lir, ta Deputy Commissioner & District Election Officer Mokokchung Shashank Pratap Singh IAS ajanga sangdong ka nung metetdaksü.

Political representative/ Election agents kari metetnüba/ ashishitep lira, Observer dang agüja aliba mobile number nungi asüngdangtetsü mesüra Room No. 001, GA Rest House nung nikongdang 4:00 ako nungi 5:00 ako tsüngta tsüngtong oa ajurutsü akok.

21- Tuli, 22- Arkakong, 23- Impur aser 24- Angetyongpang

constituency atema General Observer, Prashant Kumar Panda IAS (2008) Mobile No. 9863747627; Expenditure Observer Ratnesh Kumar IRAS (2008) mobile No. 6009892267; 25- Mongoya, 26- Aonglenden, 27- Mokokchung Town aser 28- Koridang constituency atema General Observer, Alka Srivastava IAS (2003) Mobile No. 6009943105; Expenditure Observer Suven Das Gupta IRS (C&CE) (2008) Mobile No. 9366382912.

29- Jangpetkong 30- Alongtaki constituency atema General Observer Kamal Kant Saroch IAS (2013) Mobile No. 6009819486; Expenditure Observer Naresh Kumar Saini IRS (C&CE) (2010) mobile No. 8787846724.

District atema designated police observer ya Dr. B.L Meena IPS (1999) Mobile No. 7005372960 alitsü.



Dimapur district atema Expenditure Observer, Suboth Singh-i Deputy Commissioner, Dimapur indang Conference Hall nung February 8, 2023 nü ROs, AEOs, Accounting teams aser Nodal Officers MCMC Dimapur nunger den sensaksemba noksa nung angur.

Kohima nung arms license alir dang metetdaksür

Dimapur, Tsüklai/February 08 (TYO): General Election mapang tesunep, yimjung nung election shidak agitettsü mechi pei Police Station nung prangbong aser injang yutsüsü atema Deputy Commissioner & District Election Officer, Kohima ajanga taoba mapang metetdaksüba ama Kohima district kübok arms license alir ajak dang ano maneni license

aliba prangbong tem pei police station nung February 15, 2023 tashinung yutsüsü nenshia metetdaksür, ta Kohima Police ajanga sangdong ka nung ashi.

Iba totuyuba sülen manidaker indang license agientsüsü aser iba atema temerenshi maparen ya February 15, 2023 nü nungi tenzüktsü, ta sangdong ajanga ashi.

Assam Rifles temi Alpha Orphanage Home nem teyari agütsü

Dimapur, Tsüklai/February 08 (TYO): IGAR (North) kübok Assam Rifles, Jalukie Battalion ajanga Peren district kübok New Jalukie village nung aliba Alpha Orphanage Home nung tsürabur maliba tanurtem nem February 7, 2023 nü teyari agüja liasü.

Nungdakba osettsüset

agütsüba den külemi tanurtem dang shisaliok indang awareness agüja liasü.

Tanurtem dang temokong mapang temang anepaluyim indanga sayua liasü.

Assam Rifles temi iba ama mapa tajung inyakba atema iba Orphanage Home ketdangsür aser tanurtemi pelaba lemsatep.



New Delhi, February 08, 2023: Bodhbarnü Parliament kima Mahatma Gandhi kürakyanglu anasa opposition MP temi Adani Group ochimashi ken o bushisüngdangtsü atema joint parliamentary committee (JPC) nem agüjang, ta takhangba agüja longkak aitba noksa nung angur.

ED ajanga opposition party tem longjemdaksüogo: PM Modi

New Delhi, Tsüklai/February 08 (Agencies): Borhbarnü opposition party tem aija Ato kilonser, Narendra Modi-i, Enforcement Directorate (ED) ajanga parnok longjemdaksüogo, ta ashi.

Lok Sabha senden nung jembidang Modi-i, Opposition lenirtem electoral sabang nung longjemba tajungba süla, ajisüaka ED ajanga dang parnok longjemdaksüogo, ta ashi.

"Indian Army-i tasü tait sayu nunga Opposition-i ibaji aitsür. Bushisüngdangba agency temi ochimashi anema inyak nunga Opposition-i parnok aitsür," ta pai ashi.

Yaküm report nung, ED-i tang yimtenren lenirtem anema bushisüngdangba ochimashi ken o 121 nungi ken o 115 bo Opposition lenirtem anema lir, ta

pai metetdaksü. Congress party-a aija pai, 2004 nungi 2014 küm tashi UPA sorkar yimsüsüba tu küm ter ochimashi aser raraba mapang liasü, ta ashi.

"2004-14 tu samaba tersa (küm ter) liasü saka tang yabo India nunger tersa lir ta metettsü," ta Ato kilonserisa metetdaksü.

"Tang alimai India dak imlar, ajisüaka karibo ibaji magizükteter. India ainba aser azükarubaji alimai ngudar saka nisung karibo linüki inyaktetbatemji magizükteter," ta pai ashi.

Adani Group ochimashiba report ka tawa sangdongba sülen opposition party temi iba ken o bushisüngdangtsü atema Joint Parliamentary Committee nem agütsüsüla, mesüra SC

nem ketdangtsüa bushisüngdangdaksütsüla, ta akhangba mapang Modi-i, "Ajisüaka nisung karibo (opposition lenirtem) India ainba otsüji magizükteteri jashir. India nunger crore 140-i inyaktetba mapatemji parnoki mangur," ta aitsü.

Maneni Congress party aija Modi-i, Congress-i tamakok mejungi anguba ya alima tesem ajaklen university temi study asütsü, ta ashi.

"Tarutsü nung, Congress-i tamakok anguba ya Harvard nung dang masü saka alima tesem balala nung university aikati study asütsü," ta pai ashi.

Modi-isa Congress-i aniba UPA sorkar mapang 2G, Coalgate, votes atema sen aser Commonwealth Games ochimashi ken o balala metetdaksü.

PM Modi-i Adani kümzükba ya tejangja: Rahul Gandhi

New Delhi, Tsüklai/February 08 (Agencies): Bodhbarnü Congress party lenir, Rahul Gandhi-i, Ato kilonser, Narendra Modi-i Gautam Adani kümzükba ya tejangja, kechiyong US nung aliba research firm kati Adani Group nem tai tongloktsüba ken o bushisüngdangtsü atema pai tetuyuba magütsür, ta metetdaksü.

Paisa, "Ato kilonseri pa dang asüngdangba tasüngdangbatem atema telangzüba kata magütsü. Ni melung masür saka ibaji ajanga ochi jungkai adoktsür. Iba ken o bushisüngdangtsü

atema tetuyuba magütsür. Pa (Adani) ya par (Modi'er) medemer ka masü nungbo bushisüngdangtsü atema pai melungla. Defence sector nung shell companies atema bushisüngdang masü aser benami sen teket melenteper ajisüaka Ato kilonseri iba atemaji kecha mejembir," ta metetdaksü.

Bodhbarnü Ato kilonseri Parliament nung jembiba sülen osangbenertem den jembidang Rahul Gandhi-i, "Ato kilonseri pa (Adani) kümzükbaji tejangja," ta ashi.

Iba ken o (Adani Group) ya linük security aser linük infrastructure dak sendakba ken o ka lir, anungji Ato kilonseri, research firm kati Adani Group nem tai tonglokja aliba anema bushisüngdangtsü ta ashitsü nüngdak, ta paisa ashi.

"Iba ya ochimashi ken o tulu. Pai ibajia mashi. Atangji pai (Modi) pa (Adani) kümzüktsü meranger aser iba atemaji kuli kar alitsüa akok ta angateter," ta Rahul-i ashi.

"Ni asüngdangbatem atema Ato kilonseri kü nem telangzüba magütsü," ta paisa shisem.



February 08, 2023 nü New Delhi nung Delhi Chief Minister, Arvind Kejriwal-i taoba mapang Delhi Police nung ASI, asür, Shambhu Dayal Meena'er kinüngeritem nem sen crore 1 cheque agütsüdang tangokba noksa nung angur.

China nungeri itdangitba balloon ajanga India den linük aika itdangitogo

New Delhi, February 08 (Agencies): US media report ka ajanga, China linüki itdangitba balloon aika ajanga tesüiba küm aika India aser Japan densema linük aika itdangitogo, ta metetdaksü.

Ajisüaka item balloon ajanga India nunger sepaitem mapang kobika itdangitar osang tejangja memetet, ta kasa osang ajanga metetdaksü.

US deputy secretary of state, Wendy Sherman-i linük 40 nungi Embassy ketdangsertem nem China nunger ballon ajanga itdangitba osangji metetdakja liasü.

Tawa US sepaitemi China nunger surveillance balloon ka khazüka yokba sülen mapang tatsüka tsüngda iba report ya metetdaksü.

February 4, 2023 nü US sepaitemi Atlantic Ocean nung China nunger surveillance balloon ka khazüka yok, aser iba ama balloon ji linük balala nung sepaitem indang osettsüset aser raraba hadir itdangitssü nükjidong nung China-i asalentong yanglua inyakba asütsü, ta bilemer.

Defense & intelligence osang ajanga ashiba agi, tesüiba küm aika China-i Hainan province nung amenoker surveillance balloon ajanga linük balala nung sepaitem osettsüset, kiojen aser raraba hadirtem itdangita arur.


Item surveillance balloons mesüra airships ji People's Liberation Army (PLA) air force-i amshir aser item balloon ji continent pongu nung nguogo. Itdangitba balloon amshiba ya tanga linüktem sovereignty ozüng alema lir.

Kasa report ajanga, tamalen item ama balloon ji Hawaii, Florida, Texas aser Guam nunga nguogo ajisüaka tawa ang itemji China nunger surveillance ballon lir ta jangjar.

Mongolbarnü Pentagon-i item ama balloon anung talanglen tua yimzüba noksa aika sayaogo.

US secretary of state, Antony Blinken-i ken o jembitsü atema China semdangtsü sentong liasü, ajisüaka balloon ken o temai adokba sülen pai China semdangtsü aliba thinenogo.

Maoist ajanga rara adokba shilem 76 agi tajemba kümogo: Amit Shah



New Delhi, February 08 (Agencies): 2022 küm Maoists telungpurtem ajanga rara nung civilian aser security sepaitem 100 den tajemba asü, aser ibaji tesüiba küm 40 tsüngda nisung ishitüba asüba lir, ta Union Home Minister, Amit Shah-i metetdaksü.

2019 küm Maoists telungpurtem tashi itta aliba tesemtem nung parnok anema camp tasen 175 amenoka liasü, ta Amit Shah-i Parliamentary Committee ka nem metetdaksü.

Parliamentary consultative committee on ministry of home affairs senden nung jembidang Shah-i, sorkari mera asem-telungpurtem anema asalentong yanglua rara anema sashia nokdakba, Centre aser State tsüngda amalitepa inyakba aser Maoists teblemstü samatsütsü atema nüburtem nem shilem agidakja terenlok mapa inyakba ajanga Left-wing extremism (LWE) ajanga rara shilem 76 agi tajemba kümogo aser civilian

den sepaitem asüba shilem 90 agi tajemba kümogo, ta metetdaksü.

Narendra Modi-i aniba sorkari kiralongra khenyongi magizükteter, ta shia Shah-i, 'tangar dak memetalokba India tasenba' nung rara aser LWE atema tesem mali, ta ashi.

Paisa, home ministry-i LWE senotsü lenmang raksatsüba aser tongti lenirtem tashi meitdaksüba ajanga parnok samatsütsü nükjidong yur inyaker, ta metetdaksü.

Centre sorkari mera asem agia inyakba ajanga tesüiba küm ter tsüngda LWE rara nung civilian aser sepai asüba kanga ajema kümogo; item rara nung 2010 küm sepai aser civilian 1005 asü saka 2022 küm nungbo civilian aser sepai 98 dang asü, ta pai metetdaksü.

Tamalen Maoist telungpurtemi timtem agütsüba districts 90 liasü saka tangbo district 45 dang kümogo, ta home minister-isa metetdaksü.



TIR YIMYIM YIMOBILEM (EDITORIAL)

DIMAPUR YANGTEPNÜ, TSÜKLAI (FEBRUARY) 09, 2022

Tsüngrem nem bendanga agütsür

Yakanü Mokochung town nung yimti yimdong süa Ao Baptist Pastors' Fellowship purtemi anir Ao Baptist arogotem nung toklang tenzükertemi "ozü lima nung election merüka aginür aser ochimashi aser tashiyim anema nokdaker," ta sarasadem ola yoka ayimtena jababaji zübazübaa bilemer toktsütsüba mapa ka masü saka Nagaland nung Clean Election atema nisungtemi sentong tapu balala ayongzüka akar saka makoker, anungji Tsüngrem nem bendanga agütsüba sarasadem ola asütsü. Joko, nisungi makoker, anungji Tsüngremi dang inyaksü. Ibaji tetsübutsäka lir. Tsüngremi aochira, Nagaland nung taochi mopungsem aontsü aser nisungtem temulung meyiptsü, saka Tsüngremi maochira anüng nungi mesüra ali telong nungi kechi temerenshiang ka yoktsüar memetet. Arogoi anir Clean Election Sunday-a amonger, lokti tentettemia Clean election atema lokti sentong ayongzüka agir, sangro mejema azünger aser ken mejema atener aser mulungdangtsü jilushi tapu balala ia sayur. Ajisüaka, tzürong nung ken tendok ama aser nü tu nung tzü mamong ama asenok dak Clean Election mamonger. Aji oda, Clean election nükjidong aser mapa pusemer dang nungibo atalatsür teimba kümogo. Asenoki asenok timatempa aser takoksa angubatema ya meteter asü memetet, ashitsü makok, saka joko election nung pei vote sen yong ayokba agi aser tashiyim agi akoktsü merangba agi Nagaland ajaklen tzü dena alia ajemer, sen meindoki ana nung taneptsü aser kaketshisatsü mangur, asen lima nung senzüba garibo ajak tajung saka lenmangang kanga majung, lanurtem dak mapa inyaksü sentongbo aika tokolok nung lir saka light marur, asayadak stadium maka ser saisapong nung ajungtsü ajungshir, lenmang maka ser apu semzüker, Delhi nungi senbo yoker saka sen jagi mapa küma inyakba mangur, item tensa tiaji asen tanü asen lima tia lir, jepaka nüktsü malu. Angati kaketshisatsü angudak maka aser sen agüja azüngtsüa makoker, anungji prangpong mesüra mozü bushitsüang bilemtetter, angati taneptsü mengutet bendanglen sentsü tsüa taneptsü bushia jajar külen tesüa tasü mang bener arur, aji asenoki anogo shia ajuruba timtem aser maksütem lir, koba nük agiang mereprang, temulung ashitsüka. Iba limaji asenoki asenoksasa election nung yangluba Nagaland lir. Atangji, asenok shingaia asen lima agi nümamedangtetter, anungji asenok ajaki tajungba küma melenshidaktsüner. Ajisüaka, temelenshi tenzükermali, ajaki tangar aitsür aser tangar katiang Nagaland yanglushitsü imlar. Iba ama kasa tensa tia ka nung ano taküm küm-a election aruogo. Ashiko, joko karbo zübo keter asütsüa akok mesüra kar kiojenbo raksatsür asütsüa akok. Ano, karbo joko tangar sen bener tangar vote alia jajadar asütsüa akok. Ashiko, joko shishilemdaka kechisarina ajak nung jenjang tur asünungji, pei kija vote indang dang masü saka pei kibong ajunga indang vote jenjang sen lakh dak talia meshia alitsüa akok. Aji oda, ashiko nisung karbo pei vote tsüda sen meyerijang ter metsü agi tenük masüng jashia senzüdar asütsüa akok. Ano külen karbo, kechisüdirsäka takok angutsü tebilemba nung sentong tamajung yanglua alitsüa akok. Item alima temenen moijing tashiji nisung tashi agibo makoker, kechiyong nisungtemang moijing kümer senzür. Iba jagi arogo nung Tsüngrem tenzükertemi asen lima tia Tsüngrem nem bendanga agütsüogo. Atangji, tensa tamajungba kümaka aser nisung mulungjang temerangba kümaka, pei lima tajung kümdaktsüner aser pei nübortem timmatemtsüa nüchi küma lidaktsüner, anungji arogo aser lokti tentettemi anir ochiba election asoshi ayimtenpet ayimtenba angashir. Ajisüaka, asenoki angatetsüba kaji, election shitak agia asen lima melenshitsuabaji pastorba nungi masü mesüra lokti lenir nungi masü asen dak nungi tenzüktsü, kechiyong arogoji pastorbaji masü aser loktiji tanishirji masü saka asenok lir. Joko, asen lima nung ochiba election asoshi ajak inyaktemer, Tsüngrem ket nung agütsüogo, anungji asenok dang Tsüngremi aochitsüa asenok mulungjang aser asen mapa merüka alitsü merangdi. Atangji, tanü asenok rongnung Tsüngremi mapa inyaksü !

OLEMSABANG

KAKETSHIR MONGPO AROKO TEPONG IX

- Talitemjen Imchen

Kaketshir taküm nong küm karbo kaketshir mongpo (celebration) aser election mongpo külemi ajoror. Iba mapang kaketshir ka melong nong, kaketshir mongpo aser election mongpo teti melangteper. Tatem nong kati kokdaktsür aser kaketshir ka ji iba jaki anidaker.

Nai tsürabor kar den parnok kaketshir mapang kaketshir mongpo aser election mongpo külemi amongba otsütem, dendangtsüya (interview) südangang. Ashiko parnok taküm nonga, kaketshir mongpo o election mongpo na kasasa melangteper alitsü. Kaketshir shirnoksa election küm, election mongpo-i kokdaktsür anidakja lir, parnok pei pei taküm nong tajangzük angoba dang nongi aiben aki tamakok angoba kolitem nai angashitsü.

Onok kaketshir mapang, election aroba küm ya kaketshir ka asoshi kangasa tenükjalo mapang (confusion period) liasü. Ajaki election otsü jempidangji, aiben kaketshir ka jaki, pei kaketrijo tatidang dang nongi, iba küm jibo election jiang tongtipangba ama pilemer. Iba küm jibo kaketrijo tamakok angoyonga keja masü taa aiben pilemoko. Ojala-ibo election yabo küm pongo nong ken arotsü, saka na kaketrijo nong tamakok angoba küm jibo akümüli nong meyipa marotsü tasa ajongshi. Tanü item ajak ji shisadangang, ojala-i ashiba jisa aiben aki shidak liasü. Onok mapanga, election küm nong kaketshir shirnoki kaketshir meranga azüng, parnokbo ajak tolör tesa kümoko.

Kaketshir mongpo nong kaketshir kati keji inyaksüla? Tanü Aor tia ji reprangang. Telok aika dang kümoko. Telok ka sayasakortem (advisors), item tajongshi otem ji alima densa den tapet asü masü? Telok ka anisüngzüka mener tangar inyakba nong ajitetertem. Telok ka pei pei yari zünger kimai malor, tsürabor-i renemtsüba ajirtem. Telok ka sorkar-i pa/la asoshi mapa tajong bener arotsütsü atartem. Ao kin tejaklen-i shibai anitsü? Ao kin asoshi Aor wako ji shibai amer nokdaktsü? Ao kin samanir wako ji shibai ayipshishidaktsütsü?

Tanü poto yakpang nong alirtem ji reprangang. Yimden yimsüsür süshia, tekülem yimsüsür süshia, kija telok ajaki tanü poto majongba indang jempir. Pei poto majongba indang jempir. Süra tanü poto ji shir-i yimsüsütär? Pei pei ataba jenjang nong nokdaker densa majong, poto majong indang jempiba ji, temenünütsü ka. Tanü yimsüsürtem-i pei pei ateptsüng indang tajong tila ka danga jempi nongbo, item tilatem jaki tajong kodaka tolo akümütsüba liasü. Joko tajongshi o jempidang, alima majong nepor tashi mait onüktem jaki, alima dang masü anüng aser tsüyim süngoko. "Posü-i ayawara mapang pei tejano yokdoker, ayawara süir külen, tenüla alai tai tai ta tejano menongraa ajepba den sako."

Pei tashimait aser tamakok tolo ajanga nüksüyima terenlok tsütsü poshidang nongibo, tajong aser takok tila ka ajanga tepela aki sünger, ano talila aser toloba terenlok poshitsü koda jangratemtsü aser tenüngdaktsü.

Tanü kaketshir katibo, asüng ne yakpang mapang, ne poto ajongba indang jempitsü koda tenüngdaktsü. Kodang kaketshirtem-i kaketshir (education) shidak angazüka metettir, iba mapang alima ji sünepa akümütsü imlar. Kodang kaketshirtem dak kaketshir shidak litir, iba mapang alima ajongba indang, alima ajangzükba indang aser alima terenlok indang jempiba nepor tenarongi angashitsü. Tanü kaketshirtem-i asüng pei lima asoshi tia tajongba bener arotsü, tanü densa den pei pei kaketshirtem ji arok aroka azüngtsü koda tongtipang.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Turkey aser Syria nung lisopur Khristantemi kümzükba maparen inyaker



Tawa Turkey linük nung menoknok lendong tulu atalokba mapang Antakya (Antioch) nung aliba Tenla ki ka raksaa aliba noksa nung angur.

February 08, 2023: Tawa Turkey aser Syria na nung menoknok lendong tulu atalokba sülen mezüing kümzükba maparen inyaker aser teyari balala agütsürtemji linük ana nungji alir Khristantem liasü.

Istanbul nung aliba evangelical Miras Publishing Ministry tentetsang, Gokhan Talas-i, "Tsüngrem onok dang taochi sayuang, Khrista, onok dang taochi sayuang. Tang mapang ya onoki tanela mapa sayutsü mapang ka lir," ta sarasadema liasü.

Turkey nung par Arogo aser linük tesem ajaklen Protestant Arogotem nungi Khristantemi lendong agi kongshiba tesemtem nung nüngdakbapurtem nem agütsütsü atema blankets, mozü, baby formula aser diapers densema oset balala bendena liasü.

Talas-isa, tang ama alima linüktemi temeim mapa sayua tenla agütsüba mapang nung rongsen benbua ochimashirtema aika adoktsü, ta tekümdangtsü metetdaksü.

Turkish nung evangelical Khristan nütsüing 10,000 shi dang lir, aser parnokki tenla agüja bendenba osettsüsettemji Protestant melungtet telok First Hope Association (FHA) nem agütsüogo. FHA telok yagi Red Crescent aser AFAD den külemi inyaker.

Turkey nung magnitude 7.8 menoknok lendong nung kiojen 5,000 dak tema raksago, ta sorkar ketdangsertemi metetdaksü.

Linük nung sepai 13,000 dak temai kümzükba maparen inyaker aser tang tashi nung nisung 8,000 dak tema kümzükogo; parnokisa süki 41,000, yipten 100,000 aser blankets 300,000 lemtsüogo.

Talas'er tembar pastor, Mehmet aser kinüngtsü, Deniz natia anogo piyong nisungtem jana nungi agiteta kümzükba maparen inyaka liasü.

Ano külen Syria nunga

Association of Protestant Churches-i tentetba FHA-i kümzükba maparen inyakba den külemi teyari mapa balala inyaker, ta FHA Board Chairman, Demokan Kileci-i metetdaksü.

2014 küm Syria nung tzümetsüing lendong tulu atalokba sülen refugee tem yaritsü atema Association of Protestant Churches-i FHA ya tenteta liasü.

Kileci leniba nung züingsemtemi ghonda 14 shi agia Turkey yimtiba, Ankara nungi Gaziantep tashi oa liasü. FHA indang mobile hygiene units 5 rongnung kabo Gaziantep nungi amenokogo aser unit ana Antakya nung amenok; tanüingba unit anaji ka Kahramanmaras nung aser ka Diyarbakir nung amenoker yirua alirtem yaridar.

Menoknok lendong ajanga Turkey nung yimti ter mejungi kongshia liasü.

"Ozü linük yaritsü atema onoki akokba tashi ajak inyaker. Tang onoki nüngdakba tongtibangtibaji sarasadem lir," ta pai metetdaksü.

Linük nung prayer house aika raksago, iba dak alia Protestant Tenla ki ka den Iskenderun nung Latin Catholic Tenla ki, Greek Orthodox Tenla ki aser Armenian Apostolic Tenla kitem raksago.

Kasa yimti nungjisa evangelical Arogo ka nung mapang talangka nungi pastor inyaker, Hakan Konur aser pa kinüngtsü nata menoknok lendong nungi süogo saka par jabasobo kümzük.

Syria nunga Greek Orthodox Arogo nung putir, Emad Daher menoknok lendong nung süogo. Aleppo nung aliba Melkite Tenla ki chirepba lendong nung putir Emad asü. Iba lendong nungjagi Emeritus Archbishop, Jean-Clement Jeanbart bo tera agi kümzük, saka yirua hospital ka nung mongdar.

Ano evangelical Arogoi ketdangtsüba school tem nung

ki malirtem jenokdakja yaridar. School tem nungji Khristantem dang masü saka Muslim nungertema jenokdakja yarir.

Arogo nung putirtem, school tesayurtem aser women ministry nung lenirtemi school nung jenokdakja alir nisung 600 shi nem tzü aser chiyungtsü agütsür.

Syria nung Syriac Cross teloki Kurdish Red Crescent den senteper public parks nung süki yanglua nisung aika jenokdaksüba sülen tangbo aika kidangi meyipa odar. Syriac Cross organization ya Syria sorkari tang tashi registration magizük, anungji parnokki menoknok agi mejungi kongshiba tesemtemibo mouteter.

Sweden nung amenoka aliba European Syriac Union otongdar, Metin Rhawi-i, "Lenla kar nung onok sendaktepa lir, ibayongi onokia bilemba ama meinyakteter," ta ashi.

Rhawi-i, aid ministries aser sorkartemi aiben Khristantem sendoker, ajisüaaka Khristantemibo nisung shinga mebandangi ajak yarir, ta ashi.

"Catholics, Orthodox aser evangelical Khristantemi pei pei nüburtem asüamaba anepalur, ajisüaaka Khristan yimsü nungbo onok ajak Yisu nung asürtem lir," ta pai ashi.

Ano linük ana nung teyari agütsüba International Christian relief organizations rongnung World Vision, Send Relief aser Aid to the Church in Need densema lir.

Turkey nung 1939 küm menoknok lendong tuluba ajuruba mapang nung nisung 30,000 dak tema asü aser 1999 küm menoknok nunga nisung 17,000 dak tema asü.

Miras Publishing Ministry tentetsang, Gokhan Talas-isa, "Tsüngrem nükjidongsa tulutiba, anungji 1999 küm atalokba ama sayatonya otsü aika angashitsü imlar. Tang asenoki mangyimer, ajisüaaka kobi meli pelateptsüba mapang arutsü," ta metetdaksü.

ANO GO ABEN TSÜNGREM DEN

Taküm Tsüngkümtem

"Kechisarena asoshi Tsüngküm ka lir, aser anüing kübok mapa ajak asoshi mapang atakteta lir"

- Sayu 3:1.

Tsüngremi tsüngküm pezü balala yanglu, saka taküm indaktsütsü asoshi item tsüngküm pezü külemi mapa inyaker. Metsü tsüngkümji taküm tasen adokba. Miyi mapang ina tejang atangba mapang. Mankonang mapangji aluruba mapang lir. Mapa inyaker tem pei mapa nung taa anguba mapang. Tsüngküm mapangji tashi meiti akümba mapang lir. Taküm tebur tajung mapang süitemba mapang. Item tsüngküm melentepa aruba jagi taküm nung tongtipang lesson agütsür.

Tsüngremi yimya nung tsüngkümtem sentong yangluba ama taküm nunga tsüngkümtem yanglur. Taküm nunga metsü mapang lir. Kodang asenoki mapa tasen ka tenzükdir iba nungi tajangzük angutsü imlaa atar. Miyi mapang nung asenoki timtem arema asen nem nungloktsüba mapa meranga inyaker. Mangkonang mapang asenoki meranga inyakba nungi süngjang aonger. Tsüngküm arur, taküm mapa tatembang kati arur. Kenken tsüngküm mapang nung timtem bener arutsür, saka metsü mapang nung timtem ajak süitema aotsü asenoki imlaa atar.

Tsüngremi asenok taküm asoshi tabensa sentong yanglutsür, mapa inyakba mapang aser iba nungi tajangzük agiba mapang Pai renemtsü. Süngjema alitsü aser anisüngzüka alitsü mapang Pai renemtsü. Anogo shia kasa mapaji tamang katetta inyaka alitsü. Kenü Pai asen mapa züngdangner. Saka ano jangratemtsü aser tasen tenzüksü mapanga Pai renemtsü. Tsüngrem taochi ajanga asenoki metanga inyakba mapa nung aluruba mapang alitsü. Tsüngrem taochi ajanga asenoki timtem aser tejashi temekong tsüngküm nunga tenzüksü, kechiaser tsüngküm melii metsü mapang alitsü makok. Yimya nung tsüngkümtem amaji taküm nunga Tsüngremi mulungba abensaa inyaktsü taküm tsüngkümtem lir.

Winter Jam nung nisung 7,200 dak temai Yisu Khrista agizük

February 08, 2023: Taoba ita amang tenzüka anogo 28buba Winter Jam sentong shisadanger. Iba anogo nung nisung 7,200 dak temai nungjagi tenzüka ajak melenshi Yisu Khrista agizükogo; Winter aser Tsüngremi kü taküm nung mapang inyaka aruba ajak ni sentong ka lir.

Taküm Winter Jam ya yimti 41 nung agitsü aser iba sentong nung Khristan kentenertem aser band balalai shilem agitsü. Winter Jam ya January ita nung Tampa, Florida nung tenzüka liasü.

Tawa osangbener den jembidang Winter Jam official tour pastor, Zane Black-i, Winter Jam tour tenzüka sülen mezüngbuba hopta asem tsüngda nisung 7,216-i Khrista agizükogo aser maneni US tesem balala nung March 26 tashi ita iba sentong agitsü, ta metetdaksü.

Pastor Black-isa, "Item züingya shiaji nisung kaka lir, aser parnok nisung shiai taküm lenmang tasen nung jajatsü. Tsüngremi parnok taküm shia nung koba tashika kongshiar kodakeri dang meteta lir," ta metetdaksü.

"Ni kü taküm otsü shisadanger aser ni Yisu dak

amang tenzüka anogo shisadanger. Iba anogo nungjagi tenzüka ajak melenshi aser Tsüngremi kü taküm nung mapa inyaka aruba ajak ni bilemteter. Ajioda Tsüngremi parnok 7,216 shia taküm nung kechi inyaktsü, ta ni shisadanger," ta paisa metetdaksü.

Taküm iba tour nung shilem agitsüpurtem rongnung Jeremy Camp, We the Kingdom, Renee, Sean Be, Thrive Worship aser Winter Jam tayonger, NewSong densema lir.

Tang US tesem ajaklen lanur aika mental health tsütsü timtem aliba mapang lir, anungji item ama lanurtem nem Khrista ajanga teimla agütsütsü kanga rondaka kümogo.

Yaküm March ita nung Centers for Disease Control report ajanga, US nung tainlonglong lanurtem shilem 44 bo teimla samaogo aser tejashi ajangshir, ta metetdakja liasü.

Winter Jam ya mezüing 1995 küm tenzükdangbo anogo ka sentong dang liasü saka tangbo Khristan osangtajung kenten tour ka kümogo.

AO OSHI ANGAZÜKDAK:
TANÜ ANGAZÜKTSÜBA OJANG



Oshi

(v) bener aotsü atema khu mesüra gari nung osettsüset enokba (pack up/ load up)

* Ozü ki belena aodang gari nung khu aika **oshir** ao.

Oshilu

(n) o tanaben lephsia jembiba (repetition)

* Senden nung aikati **oshilu** jembir.

OLONG PAITEP # 6423

1		2		3		4		5
			6		7			
8								
					9			
		10						
11								12
				13		14		
15								
16						17		

TIPIEN

- 1. Nüji masü - (4)
- 3. Technütsüka - (6)
- 7. Aketa shirangba - (5)
- 8. Pi - (6)
- 9. Amena - (5)
- 10. Kinü - (5)
- 11. Tanang masü - (5)
- 13. Lenmang - (6)
- 15. Nübo tedi - (5)
- 16. Tuoshi - (6)
- 17. Shiruru apuba temenatsü - (4)

LANGTSÜNGLEN

- 1. Jila tulu - (5)
- 2. Sarasademdang tembang - (4)
- 4. Tarutsü indang ashirtem - (6)
- 5. Alia - (5)
- 6. Mojing - (5)
- 9. Tai inyakba metet - (5)
- 10. Medemer chijiba - (6)
- 11. Tatokba / Amadok - (5)
- 12. Anüngdang masü - (5)
- 14. Jabaso masü - (4)

OLONG PAITEP # 6422 TELANGZÜBA


TIPIEN :

- 1. Tesangra, 5. Mungo, 7. Kisen,
- 8. Salem, 12. Semki, 14. Kilem,
- 15. Kensü, 16. Sangpang.

LANGTSÜNGLEN :

- 1. Temesen, 2. Raksa, 3. Aon,
- 4. Aso, 6. Nile, 9. Alizung,
- 10. Omen, 11. Lemta, 13. Ola,
- 14. Kin.

Agüja aliba noksa nung meputepi aliba 10 bushiang



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüng :
- 2. Tasoba anogo:
- 3. Küm : 4. Class :
- 5. School :
- 6. Talidak :
- 7. Salem osang :

Tripura nung kiralongraba aser ozüng alema inyakbamali: Rajnath Singh



Agartala, February 8, 2023

(Agencies): Tripura nung 2018 küm BJP sorkar akümba sülen kiralongraba aser ozüng alema inyaksangshiba mali kümogo ta Union Defence Minister Rajnath Singh-i ashi.

Rajnagar nung Rajnath Singh-i Chief Minister Dr. Manik Saha den külemi election nüboyimba sentong ka nung o jembidang iba osang metetdaksü.

"Bangladesh den arrtsü ya Rajnagar anasa lir. Tang atsü atsüdüngogo aser Bangladeshi nunger sadema maitetsü. 2018 küm BJP-i 'Chalo Congress aser CPIM yimsüsüba

mapang atsü matsü saka Centre nung BJP sorkar akümba sülen iba mapa tenzük" ta pai ashi.

Congress aser CPIM sorkar mapang telungpur mapa kanga bulua inyak. Iba mapang nisungtem kodang asütsü'ar memetet saka Tripura nung BJP sorkar akümba sülen tensa melenshiogo. Tang nisung tepseter mali. Nisungtem kiralongraba aser ozüng alema inyaksangshiba kübok kanga timtemogo" ta union minister Rajnath-i ashi.

2018 küm BJP-i 'Chalo Paltai' yimyim ayimoktsü aser

tanübo nisung ajaki 'Chalo Susashan Ko Majboot banaye' ta ayimtentsü, ta paisa ashi.

"Ozü party ya India-level party ka lir saka CPIM ya state party tila ka lir. Tesüiba küm 20 tashi nu Tripura semdanga arur aser tensa nguogo. 2005 nungi 2018 tashi CPIM sorkar liasü saka Tripura nung terenlok maliasü. Onok nem küm pungu agütsüra Tripura ya linük nung state tajungtiba kümdaktsütsü" ta paisa metetdaksü.

"2018 election nungi taküm election nung BJP-i menden teimba nung takok angutsü" ta Rajnath-isa ashi.

Manipur nung Rs 4 crore alang gold bars 40 apu

Imphal, February 8, 2023

(Agencies): Manipur nung sepaitemi gold bars 40 apu aser international market nung iba indang jenjangi Rs 4 crore shi ta asadantetogo.

Myanmar den arrtsüa aliba Chandel district nung international gold smuggler ka ket nung honji apu.

Myanmar tsütsü nungi osang tejangja ka angazükba sülen

Customs division Imphal indang anti-smuggling unit ketdangsurtemi Thamapakpi nung mita atadang hon shibelener apu.

Iba nisung ya Md Umar Farukh (32) ta jangjaogo aser pa ya Imphal East district kübok Porompat Muslim road nung alir.

Umar mena aliba gari nung gold biscuits 40 (seret 6.640)

angu aser international market nung Rs 4 crore shi alang liasü.

Manipur nung international gold smuggling ya kanga bulua inyaker aser iba ya talisa Myanmar den arrtsüa aliba ajanga lir ta ketdangsurtemi ashi.

Ozüng alema shibelena osettem ya Moreh nungi Imphal-i abener aser idak nung jagi Northeast kübok tesem balalai yoker, ta parnokisa ashi.

Meghalaya police-i heroin seret 1 tema apu

Guwahati, February 8, 2023

(Agencies): Meghalaya nung East Jaintia Hills Police-i heroin seret 1 tema puogo aser iba indang jenjang ya Rs 5 crore shi ta asadantetogo.

East Jaintia Hills indang Anti-Narcotics Task Force (ANTF) ajanga mita aodang

petrol pump ka nung sapon pongdang 100 nung heroin enoka aliba angu.

Iba mapa ya Additional Superintendent of Police Banraplang Jyrwa aser Lad Rymbai Outpost nung staff-i inyak.

Iba dak sendakba nung Albert Lalro Piang ta ser nisung

ka pua lir. Pa ya Phunchawng, Aizawl nung alir aser pa ket nung mobile phone aser Rs 2,550 bena aliba puogo.

Narcotic Drugs and Psychotropic Substances (NDPS) Act kübok ken o ka benokogo ta District SP Jagpal Singh Dhanoa-i ashi.



Bodbarnü PSU Pawan Hans Ltd ajanga PSU Pawan Hans Ltd nung yimti pezü sendaktepa helicopter services tenzükogo. Hopta nung asemnü tashi Dibrugarh-Jorhat-Tezpur-Guwahati-Tezpur-Jorhat-Dibrugarh routes nung helicopter senzütsü ta Pawan Hans Ltd-i metetdaksü. Chopper service agütsüba teloki Assam Tourism Development Corporation (ATDC) den tenangzüktep ka agia item sectors nung service tenzükter.



Peru linük kübok Camana tesem nung tawa anentsüh aludang anembangba nisung tasümang tem müketa nüburttem nokdaka aliba noksa nung angur. Peru south tsütsü yimtsung kar nung tzünglur aruba ajanga anentsüh alua lishi, tzü aser long alua liasü. Asürtem rongnung van ka nung mena alir nisung pongu densema liasü, shirnok molushi agi ayong nung nungokja liasü.

Ukraine Tir Zelensky-i UK semdang

London, Tsüklai/February 08 (Agencies): Ukraine Tir Volodymyr Zelensky-i Britain Ato Kilonser Rishi Sunak den senden ka amener, koba Russia-i par linük amak tenzüker pai UK tang mezüngbuba semdangeralitsü.

Pai King Charles den ajurutepa Parliament nung o jembitsü lia Downing Street nung British ato kilonser den senden amener.

UK-i Ukraine sepai nem training agütsüba nung fighter jet pilots aser marines tem tashi awajemtsü lia linük ana lenir ya ajuruteper alitsü.

UK yagi Russia dak tenük yoker tenokdangba tasen sangdongogo.

Tang tesüsa tenokdangba agütsüba nung IT company tem aser ano drones aser helicopter parts amala military equipment yangluba densema lir.

Tarutsü nung NATO-standart fighter jets tem anishitsü asoshi Ukrainian pilot tem nem training agütsütsü sangdonga lir, koba Ukraine nungi mebishia liasü.

Anüolen linük temi Ukraine nem teyari tuluba agütsütsü asadanga arur, kechiaser ita tatemlen Russia-i iba linük nung asendenshir amaktsü imlaa lir.

UK-i Ukraine dangi aircraft yoktsü ya mapa kuma meinyaktetsü ta shir UK indang training sentong yagi temelenshi sayur.

British military jet tem ya khenyongi balaka aser item tayimtsütem anishitsü asoshi angazütsü ita aika agitsü, ta taoba hopta sunak indang odongtari osangbener dang shia liasü.

UK-i Ukraine dangi Challenger 2 tank tem yoktsü sentongtem sangdonga lir aser Ukraine sepaitemi itemji amshitsü training agiba mapang lir.

Ukraine indang tongtipang ki-o-jen nung tenük yoker amaktsü Russia dak tashi aliba nung timtem agütsütsü asoshi

Sunak-i Ukraine nem "longer range capabilities" agütsütsü, ta Downing Street ajanga ashi. British nungeri training agütsüba taküm timba akumtsü aser Ukraine nunger sepai 20,000 nem training agütsütsü renema lir, ta ashi.

Tir Zelensky-i ajungbena London semdangba ya Russia-i taoba küm February ita Ukraine amak tenzüker linük yutsür aoba tanabuba alitsü.

Pai December ita United States semdang aser kidangi meyipa shilangba sülen Poland Tir Andrzej Duda ajurua jembishinüa liasü.

Pai Washington DC semdangba mapang US Congress nung jemi aser Ukraine-i kodanga bendanga magütsütsü, ta shia liasü.

US Tir Joe Biden-ia Ukraine nem teyari tali agütsütsü sangdong aser yangji Patriot missile defence system densema lir.

Tir Zelensky-i MP tem den taoba küm March ita Kyiv nungi virtual yimya nung jembia liasü, aser ibaji bendang lenir kati Commons chamber nung MP tem den jembiba mezüngbuba liasü.

Pai Brussels semdangtsü ta olulu adoka aliba mapang UK semdang. Pai Brehostibarnü European Parliament nung jembitsü imlar aser EU lenirtem senden ka nung adentsü.

Iba osang ya hopta tetenzüklen temai adok, anungji security mechi iba sentong ya athitsü akok ta akum.

Taoba küm February ita nungi tenzüka Russia-i Ukraine amakdang UK-i mitkar nem teyari agütsüba ya sen billion £2.3 jenjang lir, anungji US sülen timtiba tenla agütsür linük akum. Sorkari taküma kasa teyari agütsütsü sentong lir ta ashi.

UK-i Russian dak senotsü tsütsü tenokdangba balala agüja lir aser Ukraine nunger refugee 100,000 dak tema anioka lir.

Tang tashinung UK-i Ukraine nem mitkar tsütsü hadir balala agütsüba yamai alitsü:

Ana-meta nung ayimba aircraft tem khazüka yoktsü yangluba Starstreak densema air defence system kar, Challenger 2 tanks, 30 AS90 self propelled artillery guns densema aritkkery, 155mm injang meyerijang aika, M270 multiple-launch rocket systems den M31A1 precision munitions, Next-generation light anti-tank weapons mesüra Nlaw, Maritime Brimstone missiles, Mastiff patrol vehicles densema Armoured vehicles, Heavy lift unmanned aerial vehicle (UAV) systems aser Electronic warfare equipments.

Turkey, Syria menoknok nung asür nisung 11,000 jungogo



Turkey south tsütsü menoknok agi kongshir aliba Iskenderun jila nung rongnendak container arongba nungi mokozü adokba noksa nung angur.

Istanbul, Tsüklai/February 08 (Agencies): Bodhbarnü southern Turkey aser rara agi raksatsür aliba northern Syria nung asür nisung 9,000 alemogo aser tekumzüker temi menoknok ajanga anoksatsür aliba tesem nungi takum alirtem kumzütsü meranger.

Ketdangtsür aser medics temi ashiba agi Turkey nung nisung 8,574 süogo aser Syria nung nisung 2,662 süogo, anungji linük ana nung asür ajak agi 11,236 ajunger. Ajisüaka mongintemi tsüboa bilemba ama atalokra asürtem kanga agi timba akumtsü.

Ki-o-jen teraksa nungi nisung takum kumzütsü teimla samar, kechiaser Hombarnep menoknok magnitude 7.8 anoker mapang talangka süyia aor, koba Turkey nung 1939 sülen tesashitiba menoknok alitsü, kong nisung 33,000 shi anüdoklen Erzincan province nung asü.

Ao Baptist Arogo Mungdang (ABAM)
 IMPUR-798 615, MOKOKCHUNG, NAGALAND: INDIA
 E-mail: abamimpur7@yahoo.co.in
 Website: www.abamimpur.org
 ☎ : 0369-2262202 (O)

METETDAKTSÜR

February 14, 2023, nung Ao Baptist Arogo Mungdang (ABAM) ajanga aruya aliba 14th Nagaland Legislative Assembly Election nung Aor shirnoksa Contest asütsü ali, nenok ajak den ABAM-i sensaksem aser sarasadem sentong ayonger. Anungji Candidatetem ajak February 14, 2023, 1:00 PM nung ABAM Office, Impur, tonga arutsü mepishir. Candidate ajak dangi anogo ishika tsüngda shiti yoktsü. Iba sentong ya tongtipang ta angateta medema arutsü metetdakja atar.

Sd/-
 Rev. Temshi Longkümer
 President, ABAM

Handwritten signature
 Rev. Dr. Mar Pongener
 Executive Secretary, ABAM

SANGDONGER

February 4, 2023 anogo senden mena 24 Angetyongpang BJP Chakpa Unit nungi Rank aser Files ajaki pei tatah mendentem toktsütsü lemteter aser aruya aliba 14-buba Nagaland Legislative Assembly General election nung Shri. S. Maongkaba Ozukum, shiba NPP candidate lir pa nungita yaritsü bangjemba sangdonger.

Handwritten signature
 Zululemba Lkr
 President
 (BJP)

Handwritten signature
 Kumlipongsang Jamir
 General Secretary
 (BJP)

SANGDONGER

24 Angetyongpang A/C NDPP Parents aser Youth Wing, Chakpa Unit nungi item lenirtemi pei tatah mapa toktsütsü lemteter aser aruya aliba 14-buba Nagaland Legislative Assembly election nung kecha tashishitep melii Shri. S. Maongkaba Ozukum, NPP Candidate nungita yaritsü bangjemba renemba sangdonger.

1. Mr. Soachipen A/Gs Parent body *Handwritten signature*
 2. Mr. Imlikumzuk Vice/P Youth wing *Handwritten signature*
 3. Mr. Nokchingsomba General Secretary Youth wing *Handwritten signature*
 4. Mr. Rongnenba A/Gs Youth wing *Handwritten signature*

Kibong aika ki-o-jen teraksa agi anembangba lir aser menoknok anoker ghonda 50 dak tema jungogo, anungji asür tali akumtsü akok, ta Syrian Civil Defence ajanga Twitter nung ashi.

Turkish emergency personnel 24,000 dak tema den yariteptsü asoshi linük 20 dak tema nungi tebushirtem arua lir aser teyari agütsütsü nangzüker.

Linük nung nütsung yongsük million 85 aliba nungi iba menoknok agi nisung million 13 dak kongshio, ta Turkey Tir Recep Tayyip Erdogan-i ashi aser province 10 nung state of emergency sangdongogo.

Bodhbarnü Erdogan-i Kahramanmaras semdang aser menoknok nungi kumzüker tem yaritsü sentongtem sangdonga liasü.

"Nüburttem talidak ki maka metoktsütsü. Timtem ajurur alirtem hotel tem nung litettsü aser state housing authority ajanga nungdakba mapa inyaktsü," ta Erdogan-i ashi.

Syria nung 2011 nung tenzüka rara tang tashi lir aser ibaji ajanga teyari agütsüba nung timtem ajurur.

Southern Turkey nung lenmang aser danga ki-o-jen raksar aliba ajanga northern Syria nem teyari magütsüteter.

Rara mechi Syria nem anüolen linük temi tenokdangba agüja lir.

Amigos-i 8 buba Frolic Cup 2023 akok



Dimapur, Tsüklai/February 08 (TYO): Amigos FC ajanga Medziphema Village Youth Organisation nem goal 2-1 agüja Frolic Cup asemben buba atonga takok ngutetogo.

Iba asaya nung telok anaprong nungi team work aser kija shia sempet tajungtem amshia jangratema shilem agia liasü.

Iba asaya mezüing shilem nung telok katia goal magütsütet tembang aser tanabuba shilem

minute 75 buba nung MVYO nungi Thejasetuo ajanga goal ka agüja liasü.

Ajisüaka mapang tatsüka lir Amigos nungi Kekhrie-i penalty area nungi minute 80 buba nung goal ka agüka kasa-sa akum.

Mapang atakzüka aliba nung telok katia goal talila magütsüteti mapang apuloka asayatsüsa akum. Iba mapang Kekhrie-isa minute 92 buba nung goal ka agütsüteta asaya

tembanga liasü.

Iba asayamung nung kijai sempet anguba yamai alitsü:

Best Midfielder : Kekhrie Tsira (Amigos FC)

Best Defender : Toka Achumi (Amigos FC)

Best Goal Keeper : Mughato Swu (MVYO)

Highest Scorer : Thejasetuo Gwirie (MVYO)

Player of the Tournament : Thejasetuo Gwirie (MVYO).

Argentina, Chile, Paraguay & Uruguay linüktemi 2030 World Cup ayongner

Buenos Aires, Tsüklai/February 08 (Agencies): 2030 FIFA World Cup ayongtsü asoshi South American linüktem - Argentina, Chile, Paraguay aser Uruguay lungjemer 'joint bid' ka agütsüogo, koba Montevideo, Uruguay nung mezüingbuba asayamung munger küm 100 sülen amungtsü.

Mongubarnü linük pezü nungi ketdangsurtem aser South American Football Confederation (CONMEBOL) tir Alejandro Dominguez den lungjemer football asodak tesemi iba asayamung bener arutsü merangba sangdonga liasü.

"2030 World Cup ya danga mapang ama World Cup ka masü, küm 100 ajungba

benjongtsü langa lir," ta Dominguez-i Buenos Aires south tsütsü Ezeiza nung Argentine Football Association headquarters nung sentong ka alidang ashi.

"Asen jakdang arurtem nem akum agüja mezüingbuba World Cup litetba bilemtetsü FIFA teinyaktsü ka lir ta angateter."

2030 World Cup ayongtsü asoshi FIFA-i taruba küm shimtsü sentong lir, aser alima nung nungtugutiba asayamung ayongtsü asoshi imlaba linüktem tsüingta tetokteba tali tesashiba akumer.

Spain, Portugal aser Ukraine linüktemia iba asayamung ayongtsü asoshi toktepbu nung shilem agitsü molungogo, shirnok European governing body UEFA teyari lir aser ano

Saudi Arabia, Morocco, Greece, aser Egypt linük tema tebilemba lir.

World Cup ya küm pezü nung khen asayar aser Middle East nungi iba asayamung mezüing ayongzüka linükji Qatar ya akum.

Taruba asayamung ya United States, Mexico aser Canada nung 2026 küm ayongzüksü, koba linük asem külemi ayongzüka mezüingbuba alitsü.

Mezüingbuba World Cup ya 1930 küm Uruguay nung liasü aser parnoki Argentina madak 4-2 agi koka world champion mezüingbuba akum. December ita Qatar nung taoba FIFA World Cup asayadang penalty nung Argentina-i France madak takok ngua liasü.

Turkey menoknok atema Cristiano Ronaldo-i teyari agütsür

Ankara, Tsüklai/February 08 (Agencies): Hombarnep menoknok tesashi ana anokba sülen Turkey aser Syria nung 11,000 dak tema süogo. Menoknok magnitude 7.8 agi Turkey south tsütsü Kahramanmaraş province nung kongshi aser ghonda ishika lir ano magnitude 7.5 anoka liasü.

Tekumzüker temi ki-o-jen laor alidak takum alirtem maneni bushiba mapang lir. Linük balala nungi teyari agütsür aser Turkey Tir Recep Tayyip Erdogan-i southeastern province ter nung ita asem asoshi state of emergency sangdonga lir.

Football asayar temia iba lendong tesashi agi kongshir alirtem yaritsü meranger.

Turkey nunger football asayar Merih Demiral-i Twitter nung football asayar mongin Cristiano Ronaldo-i meyongnem agüja aliba jersey ka tenlar aser ibaji

auction nung yokzüka sen ajak teyari agütsütsü, ta ashi.

"Ni @Cristiano den jembiogo. Turkey nung kechi atalok, iba atema pa kanga jashir ta ashi. Onoki Ronaldo-i meyongnem agüja aliba jersey auction asütsü. Iba auction nung yokzüka ajak menoknok agi kongshia alidak amshitsü," ta Demiral-i tweet asü.

Ano Juventus nungi nungtugu asayar Leonardo Bonucci-ia meyongnem agüja aliba jersey ka tenla agütsü, ta Demiral-i ashi.

"Asen ni ano @bonucci_leo19 den jembi. Paia tejashi lemsatop aser Turkey den ozü nübur nokdaka lir ta ashi. Paia sign sür aliba Juventus jersey ka tenla agütsütsü ashi," ta Demiral-i post sütsü.

Taoba mapang Chelsea nungi asayar Christian Atsu iba menoknok lendong nungi takum kumzük. Pa ya tangbo Turkish club Hatayspor nungi asaya liasü.

LeBron James-i NBA all-time scoring record raksax



Oklahoma City Thunder den asayadang third quarter atemtsü second 10.9 lia Los Angeles Lakers nungi LeBron James-i iba 'fallway jumper shot' ajanga pa NBA all-time leading scorer kuma otsü tasen yanglu.

Los Angeles, Tsüklai/February 08 (Agencies): Los Angeles Lakers nungi LeBron James ya Mongulbarnü National Basketball Association (NBA) indang all-time leading scorer kumogo. Pa indang NBA career nung pai tang tashinung points 38,390 nguteta lir.

Oklahoma City Thunder den home game asayadang third quarter atemtsü second ter dang lia pai 'fadeaway jumpshot' ka ajanga Kareem Abdul-Jabbar ajateta alizüing tasen tongtet.

Pezüben NBA champion aser arishi küm 38 tain James dak tain akumba majiteter aser basketball asaya nung mongin ka lir.

NBA indang all-time scoring list temaba jenjang ter nung tang yakyaka asayarji James ya dang lir aser tang tasayadak nungi pa anasatiba ya Brooklyn nungi Kevin Durant lir aser pa career points 26,684 lir.

Abdul-Jabbar ya courtside nung mena liasü aser NBA puti otsü nung mamashitsü mapang James nem akum agütsür rongnung pa liasü.

"Kareem ama asayar tejen

aser tajung alidak asayatetba ya ni asoshi konang tulu lir," ta James-i terepranger dang ashiba sülen kinunger, tembar aser fans dang pelaba lemsatop.

"Küm 20 tashi küden alir nisung ajak dang kanga pelar, kechiaser nenok ajak teyari, nenok ajak temeim aser nenok ajaki bendanga agütsüba medeni ni iba jenjang metongtetla," ta pai ashi.

James-isa NBA commissioner Adam Silver aser asür David Stern nunger nem akum agüja liasü.

"Ni teti pongmanga aliba nung shilem ka südaktsütsü melaba atema nenok ajak dang kanga pelar," ta pai ashi.

- NBA indang top 10 all-time leading scorers yamai alitsü:**
- LeBron James - 38,388 points
 - Kareem Abdul-Jabbar - 38,387
 - Karl Malone - 36,928
 - Kobe Bryant - 33,643
 - Michael Jordan - 32,292
 - Dirk Nowitzki - 31,560
 - Wilt Chamberlain - 31,419
 - Shaquille O'Neal - 28,596
 - Carmelo Anthony - 28,289
 - Moses Malone - 27,409



India aser Australia tsüingta Border-Gavaskar Trophy (cricket) tenzüksü lia Maharashtra kübok Nagpur nung aliba Vidharba Cricket Stadium nung Indian captain Rohit Sharma aser Australian captain Pat Cummins na trophy den tangokba noksa nung angur.

BILEMDANGANG
 "Nü taküm tangar den temedem dang; Naji na."